

քահանայից եւ 'ի վարդապետաց անտի Ծայթ կոչեցելոց բնակեալ յԵրուսաղէմ եւ 'ի սահմանս նորա : Եւ ոմանք 'ի կղերականաց խորշէին հաղորդիլ ընդ նոսա , եւ հարցին ցՊատրիարքն Անտիոքայ , եւ Նիքոնն հրաման ետ հաղորդիլ ընդ նոսա 'ի հոգեւորս . զի 'ի բազում տեղիս նահանգի նորին բնակէին բազմաթիւ քահանայք եւ կրօնաւորք 'ի Ծայթ կոչեցելոց . լեզու , գիրք եւ ընթերցուածք նոցա Հայերէն . բանք նոցա ճշմարիտք իբրեւ գրոց մերոց . նոյնպէս եւ հաւատք նոցին , եւ ոմանք 'ի նոցանէ կային մինչեւ 'ի ժամանակս մեր բնակեալ 'ի քաղաքն Կարնոյ , եւ ձեռնադրութիւնն առնուին 'ի Պատրիարքէն Անտիոքայ , որպէս եւ ինքն ձեռնադրեալ է զԵպիսկոպոսս եւ Քահանայս :

Սուքա են բուն յազգէն Հայոց եւ բաժանեցան 'ի պատճառս խռովութեան ժողովոյն Քաղկեդոնի , եւ կոչին Հայ հոռոճ , եւ ընակին այժմ 'ի կողմանս Ակնայ եւ դաղթեալ ոմանց 'ի Բիւթանիա , եւ մինչեւ ցարդ վարին հայկական դպրութեամբ յեկեղեցիս եւ 'ի քաղաքական կենցաղս . բայց տգիտաբար զինքեանս Յոյն կոչեն :



Գ Լ Ո Ւ Խ Ժ Բ .

Երկրորդ ժողով Կոստանդինուպոլսի : Վանք Սաբայ կրօնաւորի :
Թուղթ Գրիգորի Եպիսկոպոսի Արծրունեաց 'ի Հայս :
Վասն տօնի Տեառնընդառաջի :

Ի Հայրապետութեան Աթոռոյն Երուսաղէմի Եղիայի յարեաւ խռովութիւն յաշխարհին Պաղեստինացւոց 'ի մէջ միանձանցն մեծի Լաւրայի , այն է վանք սրբոյն Սաբայ , վասն մուրաական գրոց Որոգինեայ , զորս յառաջագոյն հարք ժողովոց մերժեալ էին : Թէպէտ եւ Եղիա հայրապետ խորհրդով Ս . Սաբայ եհան արտաքսեաց զԽռովարարսն 'ի ժողովոյ եղբարոց , այլ յանկանել Եղիայի 'ի ձեռն Անաստասայ Կայսեր եւ 'ի մեռանիլ Ս . Սաբայ , համարձակութիւն գտեալ խռովչաց՝ որսացին զբազում միանձունս 'ի կողմն իւրեանց , եւ սկսան համարձակ քարո-